



Redaksioneel

Hierdie eerste uitgawe van 2011 bevat weereens 'n verskeidenheid artikels oor die breë terrein van die teologiese ensiklopedie. Fritz de Wet behandel die noodsaak van 'n duidelike uiteensetting van meta-teoretiese vertrekpunte in Prakties-Teologiese ondersoek. Dit is in opvolging van sy vorige artikel wat ook in *In die Skriflig* gepubliseer is. Hy verduidelik die reformatoriese werklikheidsvisie en bespreek die toepassing daarvan in 'n moderne konteks. Dit is deel van 'n ondersoek wat gedoen word oor meta-teorie in die vakgroep Praktiese Teologie aan die Fakulteit Teologie van die Noordwes-Universiteit se Potchefstroomkampus. Hierdie studie is belangrik, veral in die lig van die liberale teologie se bevraagtekening van die geldigheid van 'n Bybels-teologiese metateorie in wetenskaplike ondersoek. Ook ander dissiplines in die gereformeerde teologie kan daarby baat vind. Fanie Snyman van die Fakulteit Teologie aan die Universiteit van die Vrystaat lewer 'n welkome bydrae met sy omvangryke en grondige studie van Psalm 117 – 'n psalm waaroor nog min geskryf is. Hy omlyn die teologiese boodskap en bespreek die prediking daarvan aan die hand van die kultuurhistoriese agtergrond van die psalm. Jan du Rand lewer ook 'n waardevolle bydrae oor die verskillende interpretasies van Openbaring 6:9-11. Hy wys op die leemtes in bestaande kommentare en bied 'n nuwe interpretasie aan die hand van die psigologiese en sosio-kulturele konteks van die eerste lesers van Openbaring, asook die saak van “martelaarskap” in die Vroeë Kerk.

Stephen Giles vergelyk die imperatiewe van die Skrif en die Suid-Afrikaanse Grondwet oor die reg op lewe en pleit dat die imperatiewe van die Skrif as Godsopenbaring voorrang moet geniet bo die Grondwet wanneer die reg op lewe gepositieer moet word. Hiervoor beroep hy hom op die uiters belangrike rol wat die konsep *lewe* in die evangelie speel soos die liefdesgebod, die roeping tot dissipelskap en die navolging van Christus. Ben de Klerk stel 'n aanvullende formulier by die huidige Nagmaalsformulier voor wat die kernelemente van die Pasga uitlig, veral die ootmoed oor sonde en die ontvangs van vergiffenis. Hy raak 'n belangrike saak aan, want simboliek word al hoe belangriker in die kontemporêre wyses van

viering en aanbidding. Mag sy voorstelle verdere positiewe diskussie ontlok.

Ian Nell ondersoek die rol van Praktiese Teologie in die teologie van Calvyn en veral op die moontlikhede van teodramatiese benadering in lering en onderrig. Dramatiese voorstellings van historiese gebeure en heilselemente van die evangelie kry vandag nuwe aandag in die evangelisering van mense en veral kinders. Ons plaas hierdie artikel om ook hieroor 'n waardevolle diskussie aan die gang te sit. Benewens simboliek en 'n nuwe aanbod van die evangelie word die begrip spiritualiteit ook teologies druk bespreek. Die postmodernisme stel spiritualiteit weer op die voorgrond as bewys van die moderne mens se soeke na godsdienstigheid wat, volgens bewering, nie in kerke te vind is nie. Hierdie konsep moet daarom ook vanuit 'n gereformeerde perspektief ondersoek word. Amie van Wyk lewer in hierdie opsig 'n belangrike bydrae met sy ondersoek na die *praxis pietatis* by Augustinus.

Annamarie de Beer en Jan-Albert van den Berg behandel promissio-terapie en eskatologie by die hantering van vroue wat 'n eggenoot aan die dood afgestaan het. Hulle wys op die trauma van onsekerheid ten spyte van die belofte van ewige lewe en ondersoek die wyse waarop hoop in die rouproses aangebied kan word. Hierdie navorsingsartikel bied gegewens wat toepaslik is in die pastoraat en is handig vir predikante wat baie met roumart te doen kry. Ook op die pastorale terrein bied Vhumani Magezi en Timothy Myambo 'n wetenskaplike ondersoek aan oor die uitdagings en vrese wat die geloof in wraakgierige "geeste" by die Shonavolk teweeg bring. Hulle bied 'n bybelse evaluering en respons aan.

Die artikels in hierdie uitgawe bestryk 'n wye veld in die teologie, maar gee ook prinsipiële en praktiese riglyne vir die kerklike bediening. Mag die lesers daarby baat vind.

J.M. Vorster

Redakteur: *In die Skriflig*